

Il pestgaders dastgan passar en l'aua

Regenza e parlament vulan augmentar l'attractivada da la pestga

■ (anr/ac) Il cussegl grond è suandà las propostas da la regenza e da la cummissiun predeliberanta per promover la pestga en il chantun Grischun. Cun 94 vers ina vusch ha il parlament approvà gievgia suenter mezdi la revisiun da la lescha chantunala da pestga. Il chantun sustegna u il chantun po sustegnair mesiras per promover la pestga. Quella differenza en la formulaziun da l'artitgel 17 da la lescha da pestga chantunala ha betg sulet procurà per discussiun en il cussegl grond. Entaifer la cummissiun predeliberanta ha la maioritad proponì ina formulaziun cun «pudair». Quai ha explitgà il president da la cummissiun *Markus Clavadetscher* (pld, Tumlengastga) avant il plenum per motivs da poscher al chantun dapli libertad d'agir e da proteger da pretensiuns ligiantas. Ina minoritad da la cummissiun, represchentada dal deputà *Ernst Sax* (pcd, Rueun), è s'expressida per la varianta proponida da la regenza senza la formulaziun «pudair». Il cusseglier guvernativ, *Mario Cavigelli*, ha appellà a las deputadas ed als deputads da betg sa schirentar en chaussa. El ha visà a la construcziun suandanta da l'artitgel 17 formulada cun «pudair». Ina maioritad dal cussegl grond è suandada la proposta minoritara da la cummissiun e da la regenza e laschà davent la formulaziun «pudair» en l'emprima construcziun da l'artitgel 17.

Stritgà il scumond da passar en l'aua

In pau pli fundada è stada la discussiun pertutgant l'artitgel 14 da la lescha da pestga. Tant la cummissiun sco la regenza han proponì da stritgar il scumond al pestgader da passar en l'aua. Quai per



Cun diversas adattaziuns legalas speran tant la regenza sco il cussegl grond da render la pestga grischuna pli attractiva.

KEYSTONE

render pli attractiva la pestga. Il deputà *Robert Heinz* (pbd, Avras) n'ha vulì savair nagut da da quella proposta. El ha argumentà cun il privel dad auas grondas per ils pestgaders. Midadas andetgas dal nivel da l'aua en consequenza da grondas precipitaziuns e l'agir da las ovras electricas pudessan periclitar la vita dals pestgaders tenor sia argumentaziun. Quella argu-

mentaziun n'ha dentant betg pudì persuader ina maioritad dal cussegl che ha valità ils pestgaders per responsabels ed abels da giuditgar il privel. Il cussegl ha stritgà il scumond da passar en l'aua ed è sa restrenschì sin la pussaivladad dad in scumond local e temporar per proteger il cuaditsch da peschs e la gnivaziun d'utschels.

L'adattaziun da l'artitgel 6 lubescha en l'avegnir a dus giuvenils enfin 13 onns da pestgar sut surveglanza d'ina persuna en possess da la patenta e cun in attest davart las enconuschientschas da la materia. Ultra da quai profiteschan ils pestgaders enfin 18 onns medemamain da la revisiun e quai en furma dad ina taxa pli favoraivla.